385

ducati 1300 non si potrà dar le galie al tempo etc.; pertanto sia preso, de sti ducati 300 al mexe di la camera di Bergamo, che prima erano obligati mandar al dito Arsenal, et compresi in li ducati 2000 di dacii di le camere, che si soleva aver, però siano ritornati essi ducati 300 al dito Arsenal, sicome prima. Ave 61 et poi 71.

220 Et li Savii ai ordeni volseno provar li Patroni di Baruto. Et perchè era notado patron sier Francesco Contarini di sier Ferigo, qual ancora è capitanio a Baffo, licet potrà esser qui a tempo di meter banco, tamen, per esser contra le leze, sier Marco Antonio Contarini avogador non volse fusse balotado fino non fusse in questa terra.

A dì 30, la matina, fu letere di Roma, di l'Orator nostro, di 22, 24, il sumario è : come el signor Zuan Paulo Bayon era retenuto in castello et voleva dar piezaria di ducati 100 milia di non tornar a Perosa e star a obedientia dil Papa, et il Papa vol piezaria almen di homeni habino officii per ducati 30 milia in Roma. Item, par che do capi di parte di la Marcha, videlicet quelli fenno la novità di zorni passadi, havendo fatto pur excessi grandi et tenendo da la parte dil Bayon, venuti a Roma, il Papa li fece retenir, et uno di loro nominato . . . . . di Fabriano li fece taiar la testa, et sul ponte di Santo Anzolo portà il corpo con la testa taià e do torzi, e il zorno fo visto da tuti. Item, come si aspetava a Roma don Joan Hemanuel orator di la Cesarea Majestà, qual di hora in ora doveva zonzer. Item, che Lodovico da Fermo, fo fiol di Liveroto, era stà taiato a pezi dal signor Zuan di Medici, e questo per . . . . . . . Scrive come, non havendo li frati di San Beneto pagato certa tanxa si paga ogni 45 anni a la Chiexia, molti Cardinali hanno impetrato le loro abatie, per il che il Papa ha commesso la causa al cardinal de Ancona. Nota. Fo divulgato che il cardinal Corner havia impetrato Santa Justina e Praia, e il cardinal Pisani San Zorzi d'Alega e San Nicolò di Lio, tamen questa particularità non è in le letere publicate. Item, scrive zercha certa causa di sier Hironimo Marzello qu. sier Francesco, intervenendo sua madre con l'abate di Bergognoni, qual è episcopo di Cremona, videlicet sicome in le letere si contien, che di particular poco me curo. Scrive zercha Agustin Gixi, come è amalato et non si pol expedir la materia di le zoje. Item, manda letere di Napoli et di Spagna. Scrive come era andato dal Papa a dimandar la liberation di Zuan Gamba corier. Soa Santità li disse era contento si la Signoria voleva li fosse perdonà la morte havendo fatto un tanto latrocinio, e si scusa dito Orator esser andato, perchè cussi si consueta far : et l'orator vspano fo a dimandar Rocho e alcuni monetarii, e fo liberati. Scrive come fo dal Papa per dimandar licentia, che Malatesta Bajon possi venir a continuar il stipendio con la Signoria nostra, qual fu contento. dummodo il fratello nominato Curtio restasse de lì. Scrive che don Zuan Hemanuel era zonto a Fiorenza con la resolution di la Cesarea Maiestà di compiacerlo, ut dicunt, videlicet darli la pension dil reame et asolver fiorentini. Item, coloquii auti col Papa. Li ha dito esser letere fresche di Franza secrete, il Re vol saper quello vol far Soa Santità in caso l'Imperador venisse in Italia, e il Papa ha risposto, zonto sarà domino Zuan Hemanuel, li saprà risponder secondo quello el riporterà. Item, come ha visto in castello Zuan Paolo Bajon, stava dove stà li trombeti, non in molta guardia.

Da Napoli, di Hironimo Dedo secretario, 220° di . . . . Avisa la morte dil signor Fabricio Colonna

Da poi disnar, fo Pregadi per far li Savii dil Colegio.

Fu posto, per li Consieri, Cai di XL e Savii, una gratia, che sier Marco da Molin qu. sier Piero, debitor di la Signoria nostra, li officii possino risponder; et fu presa.

Fu posto, per li ditti, una altra gratia di sier Marco Antonio Lolin e fradelli qu. sier Anzolo, debitori di la Signoria nostra per conto di suo padre a più officii, di poter pagar, *videlicet* li officii rispondino a tal suo debito come vol la leze; et fu presa.

Fu posto, per i Savii ai ordeni, et sier Lodovico Michiel è intrato in luogo di sier Marin Justinian andò fuora di la terra, che 'l sia confirmà una concession fata per sier Marco Antonio Calbo, olim synico in Levante, a Thodaro qu. Dimitri dal Zante dil 1515 a dì 28 Zugno, atento la morte miseranda dil padre su la nave Pandora e di so' barbani morti da' turchi a la obsidion di Modon, e lui Thodaro fu preso e stete in catività, videlicet li sia concesso cavalaroto al Zante in loco dil primo vachante. Ave 123 di si, 11 di no, 5 non sincere; fu presa.

Fu fato il scurtinio di 4 Savii dil Consejo, uno di qual sia per 3 mexi, e do Savii a Terra ferma ordinarii. Il scurtinio sarà qui posto. Rimase sier Francesco Contarini, eleto orator in Spagna, qu. sier Zacaria el cavalier, qual da eri in qua se intese si feva tuor; et sier Marco Contarini suo fradello camerlengo di comun si oferse et rimase; ha anni . . .